



UKA 2018/104

18/10-2018

Justus Hansen

Kalaallit Nunaanni pinerluttulerinermi Inatsimmi § 20 imm. 2-p allanngortinnissaa pillugu danskit naalakkersuisuinut attaveqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni unioqqutitsinerit imaluunniit inatsimmi § 99 naapertorlugu unioqqutitsinerit ilungersunartut immikkut taasat pisortanit unnerluutiginnittussaataitasunit eqqartuussinermut utaqqisitassamut atatillugu unnerluutiginnissutissanngortillugit.

(Inatsisartuni ilaasortaq, Steen Lyng, Demokraatit)

Siullermeerneqarnera

Immitsinnut iluamik pissaagut ataqqillutalu. Tamanna kikkut tamarmik isumaqatigiissutigisinnaasariaqarpaat. Taamaattumik tupinnaaluppoq inuit amerlasuut tamanna ingerlatinngimmassuk. Allaanngilaq isumaqartoqarpoq Facebookimi imaluunniit Sermitsiaq.ag-p oqallittarfiani allakkaanni ajorpallaanngitsoq, oqaatiginissaanut naleqqiullugu.

Kisianni annernarpoq. Aamma ilungersutiginerusariaqarparput immitsinnut ajunngitsumik pinissarput.

Manna siunnersuut Demokraatit sinnerlugit Inatsisartuni ilaasortamit Steen Lyngemit saqqummiunneqartup ajornartorsiut tamanna kalluarpa. Qarasaasiami inuit naapittarfiisa atorneqaleraluttuinnarnerat peqatigalugu ajornannginnerulernikuuvoq immitsinnut kusanaatsumik oqaluunnissarput. Aamma immitsinnut salluliutiginissarput ajornannginnerulernikuuvoq taamatullu immitsinnut pisuuteqattaannissarput aamma ajornannginnerulernikuuvoq.

Tassunga atatillugu nutartikkamik nutaaliamillu inatsiseqarnissaput pingaaruterqarpoq kanguksaattuliorfigineqarsinnaanitsinnut nikanarsarneqarsinnaanitsinnullu illersuisussamik. Ullumikkut inatsiserput naammangilaq aamma innuttaasunik naligiissitsinngilaq. Ullumikkummi



nikanarsaalluni oqaatsit inuinnarnit unnerluussutaasinnaatitaapput, tassa imaappoq innuttaasup nammineq akisussaaffigaa suliaassanngortitsissanerluni namminerlu akilernissaa akisussaaffigalugu. Tamanna equngavoq akissarsarissaartuinnaammi periarfissaqarput kinaanertik ataqinassusertillu illersussallugit.

Tamanna tunngavigalugu siunnersuuteqartoq isumaqatigaarput oqarmat Kalaallit Nunaanni pinerluttulerinermi Inatsit allanngortittariaqartoq inatsimmi § 99 naapertorlugu unioqqutitsinerit ilungersunartut immikkut taasat pisortanit unnerluutiginnittussaataasunit eqqartuussinermut utaqqisitassamut atatillugu unnerluutiginnissutissanngortillugit.

Siunnersuutip akuerineqarnissaa inassutigaarput ingerlateqqillugulu Inatsisinut Ataatsimiititaliamut suliareqqitassanngorlugu.